

Tortolì: Su progetu “Agitòriu su Moru” si concruit cun sutzessu cun sa bìsita a S'Ortali ‘e su Monte e Santu Sarbadori



S'est concruidu stamattina su progetu “Agitòriu su Moru” cun sa bìsita ghiada in limba sarda in su situ archeològicu de S'Ortali ‘e su Monte e sa crèsia de Santu Sarbadori. S'eventu at bidu sa partetzipatzione de binti bisitadores, metades de su logu e s'àtera metade turistas bènnidos de Lombardia, Catalugna, Germània e Rùssia.

Is partetzipantes ant tentu s'oportunidade de esplorare unu de is sites archeològicos prus significativos de sa Sardigna. S'Ortali ‘e su Monte oferit una testimonia rica

de sa preistòria de s'isula, cun elementos comente is domus de janas, menhir, unu tzirculu megalìticu, unu nuraghe, una tumba de is mannos, unu bidditzolu e unu granaju. Gràtzias a sa ghia esperta de Barbara Lai, chi at fatu sa bìsita in limba sarda, is bisitadores ant pòdidu connòschere tres millènnios de istòria sarda, dea su Neolìticu a sa prima edade de su ferru.

A pustis de s'Ortali ‘e su Monte is bisitadores sunt andados a sa crèsia de su sartu de Santu Sarbadore. Giorgio Ladu, presidente de su comitadu, at retzidu su grupu, acrarende s'importu istòricu e culturale de sa festa de Santu Sarbadore pro sa comunidade de Tortolì, cumpartzende contos e alleghende de is traditziones seculares acapiadas a sa festa, comente sa de s'imbidu. A s'acabbu de sa bìsita, is partetzipantes ant fatu una piticu cumbidu a palas sa crèsia, chi faghet craru dae Monte Turri, a santu Millanu finas a Orrì.

S'eventu est istadu possibile gràtzias unu finantziamentu otentu dae su Comunu de Tortolì chi at partetzipadu a s'avisu TuLis 2023 de sa Regione Autònoma de sa Sardigna. Custu finantziamentu previdit diversas fainas de promotzione linguistica e culturale, comente laboratòrios iscolàsticos, cursos de formatzione e iniciativas de promotzione territoriale e turistica.